

*Torres.* En esto tanto vos teneys razon en no admitir disculpa del tiempo.

*Marcio.* Agora disculpemoslo con la disculpa ordinaria, *Quandoque bonus dormitat Homerus.*

*Torres.* La disculpa es magra; pero valga lo que valiere; que yo tanto por lo que os he oido dezir, vengo a creer lo que jamas me avia podido persuadir, que para saber ordenar un Libro destes fingidos, es menester mas que ser letrado en Romance.

*Valdes.* Pues si discurriessemos por el Libro adelante, os mostraria maravillas; pero por la vispera podeys sacar el difanto, y por la muestra podeys juzgar de la color del paño. Esto he dicho contra mi voluntad por satisfazeros a lo mucho que dixistes, que os maravillavades de lo que me oíades dezir del Libro de Amadis; y no porque me huelgue de dezir mal, ni de reprehender lo que otros hazen; y vosotros, Señores, pensad que aunque he dicho esto de Amadis, tambien digo tiene muchas, y muy buenas cosas; y que es dino de ser leido de los que quieren aprender la Lengua; pero entended que no todo lo que en él hallaredes, lo aveys de tener por bueno.

*Marcio.* Assi lo entendemos. I de los que han escrito las Historias de los Reyes de España; teneys algunos que tengan buen estylo?

*Valdes.* Para deziros verdad, ninguno de los que he visto me satisface tanto, que osasse ala-